



Australian  
**BORDER FORCE**

## Perantau - konsesi tanpa duti

Perantau antarabangsa, termasuklah anak kapal, yang tiba di Australia berhak mendapat beberapa konsesi barangan. Konsesi tanpa duti akan diberikan selagi barangan dibeli untuk kegunaan sendiri dan dibawa bersama perantau sebagai bagasi tangan ataupun bagasi berdaftar.

Barangan persendirian tidak dikenakan duti dan cukai jika barangan itu:

- dimiliki dan digunakan oleh rantau itu di luar negeri selama 12 bulan atau lebih sebelum tiba di Australia, atau
- diimport secara sementara (cagaran dalam bentuk wang tunai atau jaminan bank mungkin diperlukan oleh Jabatan Imigresen Dan Perlindungan Sempadan).

Had mungkin dikenakan terhadap barangan lain, termasuklah barangan yang dibeli di luar negeri dan di kedai-kedai tanpa duti setibanya di Australia. Apabila penduduk membeli barangan di kedai-kedai tanpa duti semasa merantau ke luar Australia, barangan tersebut mungkin dikenakan duti atau cukai apabila mereka pulang.

**Perhatian:** Konsesi yang berlainan diberikan kepada penumpang dan anak kapal.

### Konsesi untuk penumpang

Penumpang berhak membawa balik barangan am, arak dan tembakau yang berikut tanpa dikenakan duti dan/atau cukai:

- pakaian dan kasut sendiri (tidak termasuk pakaian yang diperbuat daripada bulu haiwan)
- barang-barang kebersihan dan pendandan diri (tidak termasuk pekatan minyak wangi)
- barangan yang dibawa balik oleh penduduk dan barangan itu telah dibawa keluar dari Australia apabila dia berlepas, kecuali barangan yang dibeli tanpa duti atau tanpa cukai semasa meninggalkan Australia, ataupun yang telah diberi bayaran baliknya di bawah Skim Bayaran Balik Pelancong
- barangan yang dibawa masuk ke Australia oleh pelawat dan akan dibawa keluar apabila dia meninggalkan Australia kelak
- barangan persendirian (termasuk pakaian yang diperbuat daripada bulu haiwan) yang sudah dimiliki dan digunakan oleh perantau dalam tempoh 12 bulan sebelum diimport
- barang-barang lain setakat jumlah harga belian yang tidak melebihi AUD\$900 bagi setiap orang dewasa dan AUD\$450 bagi setiap kanak-kanak (arak dan produk tembakau tidak terangkum oleh konsesi sebanyak AUD\$900 ini)
- minuman keras sebanyak 2.25 liter bagi setiap penumpang yang berusia 18 tahun ke atas, dan
- tembakau seberat 25 gram dalam apa jua bentuk (rokok, daun, dan sebagainya), yang bersamaan dengan kira-kira 25 batang rokok, berserta satu bungkusan yang sudah dibuka, bagi setiap penumpang yang berusia 18 tahun ke atas.

## Konsesi untuk anak kapal

Anak kapal berhak mendapat konsesi yang berikut:

- pakaian, barang-barang kebersihan dan pendandan diri (tidak termasuk pakaian yang diperbuat daripada bulu haiwan dan pekatan minyak wangi)
- barangan yang dibawa balik oleh anak kapal dan akan dibawa keluar apabila dia meninggalkan Australia kelak
- barang-barang lain setakat jumlah harga belian yang tidak melebihi AUD\$450
- minuman keras sebanyak 2.25 liter bagi setiap anak kapal yang berusia 18 tahun ke atas, dan
- tembakau seberat 25 gram dalam apa jua bentuk (rokok, daun, dan sebagainya), yang bersamaan dengan kira-kira 25 batang rokok, berserta satu bungkusan yang sudah dibuka, bagi setiap anak kapal yang berusia 18 tahun ke atas.

Anak kapal tidak dibenarkan bergabung konsesi.

## Melebihi had tanpa duti

Jika perantau membawa barangan yang melebihi had tanpa duti Australia, duti dan cukai akan dikenakan terhadap semua barang yang sama jenis (barangan am, arak atau tembakau), dan bukan hanya barangan yang melebihi had itu.

Jika perantau mempunyai apa-apa yang melebihi konsesi tanpa dutinya, dia mestilah mengisytiharkan barangan itu dan mengemukakan bukti beliannya kepada seorang pegawai Pengawal Sempadan Australia untuk dikira duti dan cukai yang perlu dibayar.

Kegagalan mengisytiharkan barangan melebihi apa yang ada pada perantau boleh mengakibatkan hukuman dikenakan.

## Menggabungkan peruntukan setiap orang bagi kumpulan sekeluarga yang memasuki Australia

Kumpulan sekeluarga berhak menggabungkan konsesi mereka dengan syarat ahli-ahli keluarga tiba menaiki penerbangan/pelayaran yang sama dan dinilai kelayakan masing-masing (iaitu diproses di sempadan) bersama-sama.

Contohnya, keluarga yang terdiri daripada empat orang (2 orang dewasa dan 2 kanak-kanak) berhak membawa masuk:

- 4.5 liter minuman keras (2 x peruntukan arak untuk orang dewasa sebanyak 2.25 liter = 4.5 liter)
- 50 batang rokok (2 x peruntukan tembakau untuk orang dewasa sebanyak 25 batang rokok = 50 batang rokok) berserta 2 x bungkusan yang sudah dibuka
- barangan am bernilai \$2,700 (merangkumi hadiah, cenderamata, kamera, peralatan elektronik, barangan kulit, barang kemas, jam tangan dan peralatan sukan) (2 x peruntukan barangan am untuk orang dewasa (\$900) + 2 x peruntukan barangan am untuk perantau yang belum mencapai usia 18 tahun (\$450)).

Penggabungan peruntukan konsesi tanpa duti juga mungkin dibenarkan dalam keadaan pemilikan bersama. Contohnya, jika dua adik-beradik yang merantau bersama-sama membeli suatu barang

bersama-sama, dan mempunyai dokumen (contohnya resit) untuk membuktikan pemilikan bersama, maka mereka dibenarkan menggabungkan konsesi tanpa duti mereka.

## Pulang ke Australia dengan membawa barangan yang tertakluk kepada peruntukan Skim Bayaran Balik Pelancong (TRS)

Jika perantau pulang ke Australia membawa barangan yang sudah dituntut bayaran balik GST di bawah TRS semasa berlepas, maka dia mestilah mengisytiharkan barangan tersebut di dalam Soalan 3 pada Kad Penumpang Masuk jika nilainya melebihi konsesi penumpang sebanyak AUD\$900.

Bayaran balik GST yang diterima bagi barangan yang melebihi konsesi penumpang perlu dibayar semula jika barang itu dibawa masuk ke Australia.